

Edjean Semeleer cu tema promocional nobo!!

AWE nochi den e edicion di “Na Drempel di Fin di Aña” e cantante di e temanan manera, “Ta Navidad”, “Paranda le la la”, “Bus di Alegria”, “Yen di Energia” y hopi mas, esta e cantante Edjean Semeleer lo lansa su tema promocional pa loke ta e temporada di fin di aña 2007. Y no mucho dia despues, esta Diabierna awo, dia 19 di Oktober, e lo pone su produccion oficialmente riba mercado!



Segun informacion cu Awe-mainta ta dispone di dje ta indica cu e produccion di e aña aki ta uno completamente diferente cu esnan di e añanan anterior. Pues atrobe Edjean lo bay demostra su habilidad como cantante y productor di su mesun produccionnan. Ora nos ta papia di Edjean Semeleer mas cu claro nos ta papia di produccionan di calidad y cu profesionalnan su tras, e.o. nos por menciona Hildward Croes, Chucho Hoek, Maikol Lugo, Papito Rafael, Delbert Bernabela, Ivan Quandus, Juan Carlos Petit, Doodle Sophia y hopi mas. E tema promocional ta un composicion di Chucho Hoek.

E maestro respeta pa hopi aki na Aruba. Aña pasa Chucho a sa di trese un toke apart y masha

pegahoso cu su tema original “Paranda le la la”. Pues ansioso sigur nos ta pa tende ki fantasia y creatividad Chucho lo trese dilanti e aña aki y mas cu claro canta pa e voz di Edjean, esaki lo ta e combinacion perfecto!

Grabacion di e tema aki a ser haci den e studio di IQ MUSIC LAB y mirando cu Edjean semper ta sorprende tur hende aña tras di aña cu su temanan y produccionnan unico... e expectativa ta grandi pa scucha su tema promocional y sigur e produccion nobo pa e temporada aki. Aruba, abo ta keda invita pa awenochi den “Na Drempel di Fin di Aña” pa scucha e lansamento di e tema di Edjean Semeleer! Y prepara bo pa e produccion cu ta na caminda!

